



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakngma :



Tir Yimym



tiryimym@aolima



tir yimym

TAPAK 8

Imran Khan-i Feb 8 election nung aoksatsütsü ashi

ICC T20I Rankings: Axar Patel pongububai tuogo



VOL. XXI NO. 95 (ADOK 95)

DIMAPUR

YANGTEPNÜ (THURSDAY)

ANJETI (JANUARY) 18, 2024

₹ 5.00

'Bharat Jodo Nyay Yatra: Rahul Gandhi-i Mokokchung semdang

Mokokchung, 17th Jan (TYO): Taoba küm 9 jakdang India Prime Minister-i Naga nunger nem solution agütsütsü asoshi tenangzükba yanglu, saka tanü tashi meinyakba ya maaksü aser iba atema aaka bilemer, ta 17th Jan, 2024 nü Rahul Gandhi-i metetdaksü. Pai iba o ya Mokokchung town police point nung nübürmeyirjang sendena alidak metetdaksü.

Tang Rahul Gandhi ya North-East state-tem sema 'Bharat Jodo Nyay Yatra' sentong agia jajaba mapang lir. Iba sentong ya talisa India nung tang yimsü tesüdak BJP-i aniba sorkari maparen aisü nung ochi mashi inyakba aser tim mesüi yimsü asüba, maparen aika nung ochi obendang temeten magütsütetba aser nübürtem aika timtemdaksüba aser takoksa ajuruba anema ola adoka India lima ajunga sema jajar. Kasa sentongji 14th Jan, 2024 nungi North-East state-tem sema jajar.

Tanep Rahul Gandhi Mokokchung-i arudang Rotary House Mokokchung nung anener yang nung jagi yimdong süa jajaa or Mokokchung Police Point nung pai nübürmeyirjang sentepa alidak 'Bharat Jodo Nyay Yatra' akaba nükjidong lemsatep.

Bharat Jodo Nyay Yatra' sentong ya tongtibatanga India nung tamangba yimsü balala den sobaliba, yimsüyimbong, shisatsü



asere oshi balalatem külemi telungjem kati bener arutsü, state balala tia metettsü aser nübür ola angadangsü nükjidong nung ayonga akar. India nung tanga state-tem ama North-East state tema kasa jenjang nung kechisarena ajak nung renloksü tongtibang ta sayutsü asoshi iba sentong ya yangi ayonger, ta Rahul Gandhi-i ashi.

Nütsüng aika ishika ta kecha mali saka North-East state-tema tangar amaji sakuku tongtibang lir, ta paisa shisem.

Anogo ananü tashi Nagaland nung mapang tajung alangzükba jangratema munga aruba den pa Mokokchungi arudang Alichen nung kibong kati süngojemi jaokba asoshia pelaba pai metetdaksü. Nagaland-i arutsü maongka anguba den nübürtemi temeim sayuba ya pai kodanga mamatoktsü, ta paisa pelaba lemsatep.

Kohima nungi ya tashi arudang, Naga nunger sobaliba koda temerük, aji angatetogo, ta pai ashi. 'Naga nungeri English angateter, saka tanü Ao oshi agi kü o meyipdaksüba ya tongtibatanga ni tangar sobaliba akümtsübuba yong lir, tanga state sema jajadang ni yamaji inyaker, saka RSS & BJP-i tangar sobaliba aküm metsübur, ta pai kuli kar dena ashi. 'Nai kechi amanger, kechi achir, kechi yimsüyimbong beshir, itemji tangar tebilemstsü masü, ibaji shingai raksatsütsü makok', ta paisa shisem.

Nagaland nung aliba nübürtem iba lenmang nung jajaba ya ochi mashi aser ashioksüba mapa lir, iba ama lenmang tia yagi lanurtem tarutsü jenjang aser teimla kong yutsür, ta paisa asüngdanga liasü. Iba ama lenmang nung jajartemi tangar den koda tokteptettsü, ta paisa asüngdanga ashi. Nagaland

ochi mashibaji iba lenmang yagi sayur, ta paisa shisem.

Nagaland nung state balala nungi arua alir nübürtem aika angur, iba yagi Naga nungeri tangar akümtsübuba sayur. Iba yimyaji India nunger asoshi rongsen lir. Iba yimya tajungji tanüngba India nungeria arua reprangtsüla. Naga nunger kati ka akümtsübutepeba ama India lima yanglunür, ta paisa Naga nunger dak yimya tajung aketba asoshi tenüngsang agütsü.

'Tesüiba küm 9 jakdang Prime Minister-i Naga nunger nem solution agütsütsü asoshi tenangzükba (accord) yanglu, saka tanü tashi mapa mekümtetba ya maaksü aser iba atema aaka bilemer, meinyaktsübo menangzüktsüla, nangzükker meinyakbaji nübür ashioksüba lir', ta pai ashi. 'Solution melira lir ama nübür

dang meyzüla', ta paisa shisem.

Naga nunger yimden tebilemstsü ya ni süoki ia agir, yangi tebilemdangsü lir aser atangji solution nungdakba ajiteter. Solution ji temlung lemtet mali tashi marutettsü. Anungji, 'Bharat Jodo Nyay Yatra' sentong ya temer anogo ishika atema Nagaland-i amungi arua Naga nunger den sensak asemstsü, ta pai nangzükba ashi.

'Naga nunger dak anemsü mali indang-indanga jembiba yimya angur, nia nenok amaji lir', ta pai ashi. "Naga nunger atema Delhi nung sepia ka lir ta bilemang aser aji Rahul Gandhi lir", ta paisa ashi. Parliament nung Naga nunger atema jembitsü onük lira pai jembitsütsü mulunga lir, ta paisa shisem. Naga nunger solution atema tim mera agia inyaktüsü merangtsü, ta paisa nangzük.

Mokokchung police point nung nübürtem den jembir külen Amoklushi Resort, Chuchuyimpang nung kin hoho, mulungtet telok balala aser kaketshirtem den sensaksem aka. Iba sülen pai Chuchuyimlang nung aliba Gandhi Ashram semdang, aji sür, Changtongya nunga nübürtem den jembir aser yang nung jagi Tuli leni ao. Angazükba agi, taonung pa Tuli nung anisüngzüktsü aser 18th January, 2024 nü pa aser par telok Assam yima alutsü sentong renema lir.

PM Modi-i nangzükba meinyaker: Jairam Ramesh

Mokokchung, January/Aenjeti 17(TYO): Indian National Congress lenir Jairam Ramesh-i tanu Chuchuyimpang yimtak Amoklushi Awatsüng nung osang zülurtem den jembiba mapang India lima ajunga rongnung temerükta yimsüng shimba nung Chuchuyimpang yimsüng ya India nunger rongnung temerükta yimsüng sempet 2012 küm February 14 nu Nirmal Gram Puraskar senpet agizük aser iba yimsüng nung tetsüng ajemokba asoshi kanga dang pelarta ashi.

Congress lenir Jairam Ramesh-isa Naga yimden ken o ka süoka jembidang 2015 küm

August 3 nü Framework Agreement renem aser Prime Minister Modi-i tenangzükba aika agütsü saka tanu jok küm 9 abensaka kecha meinyak lir, anungji kanga dang sasa bilemerta metetdaksü.

Nagaland nung onok tetsüng ajemoker kelen Bharat Jodo Nyay Yatra agiyonga arudang nübürtemi onoki ashibatam angatetba asoshi kanga dang pelar, iba den Chuchuyimpang yimtak anepalua agizükba den chiyungtsü timi renema chiyungdaksüba asoshi kangasa pelar aser iba ama yabo state government-ia onok yamai anepalu masüta metetdaksü liasü.

Tanü nungi Nagaland International Trade Expo tenzükker

Dimapur, January 17, 2024 (TYO): January 19, 2024 nü Union Minister for Micro, Small & Medium Enterprises (MSME), Narayan Rane-i 2 buba Nagaland International Trade Expo lapoktsütsü.

Iba sentong ya Senden Riju, Purana bazaar nung ayonga akatsü.

"Iba expo ayongba nükjidongji Naga entrepreneurs nem sabang ka agütsütsü aser parnok indang products & services ajungkettsü atema lir" ta BAN president Mongkum Jamir-i ashi.

"Kasa mapang nung iba sentong ajanga state sorkari entrepreneurs jangshiba nung yariteptsü aser entrepreneurs asoshi infrastructure shitak yangertsü" ta Mongkum-i ashi.

January 18-22, 2024 tashi Nagaland International Trade Expo ya Business Association of Nagas (BAN) ajanga ayongzükker aser National SC-ST Hub, National Small Industries Corporation, Ministry of Micro, Small & Medium Enterprises, Government of India ajanga teyari agütsü.

Küpza yimtak 39 Buba OKM Inti mungdangdi kadagi

Küpza, January/Aenjeti 17(TYO): 39 Buba Ongpangkong Kaketshir Mungdang(OKM) Inti mungdangdi Küpza yimtak January 17 aonung "Nüchiba Shisaluyim" dak ajemdaker January 19 tashi amongtsü renema aliba taonung kanga dang achaket keta tenzükogo.

Ongpangkong nunger kaketshirtem shisaluyimba nung nüchiba jenjang ajangzüktsü asoshi terenemba mangdang (Vision Statement) ka akatsü kanga dang nungtakerta Nagaland Legislative Assembly Speaker Wb.Sharingain Longkumeri 39 Buba Ongpangkong Kaketshir Mungdang(OKM) Inti mungdangdi lapoktsür kelen jembidang ashi.

Ongpangkong nunger shisaluyimba nung nüchiba kümteter alima nübür den toktepa tasoshia libalirotettsü asoshi terenemshiba akatsüla. Jenjang tajung ka tongtettsü asoshi temelungsentsü nung tarongba ka alitsüla, anungji iba ya ataloktsü asoshi kaketshir shiai pei jenjang khen aroka shisadangsü mapang tongja tongogota Longkumerisa

ashi.

Nagaland nung nütsüng yongsük asadangkaji kodang reprangdangdir 2011 census nung Mokokchung district population noklang (100)shilem nung lir-bo(40) ongpankong nunger iba den Election meyonngem tashi nunga Mokokchung District 158000 voters nungi 35 shilembo Ongpangkong nunger lir, iba ya asenok asoshi temoatsü ka ama saka iba ya asenok asoshi khuret ka ama agia asenoki asen nübür asoshi mangdang tajung ayutsü tenüngdaksü lir ta Sharingain Longkumerisa mungdang nung adenshia aliba kaketshirtem ayongzük.

Ongpangkong nungerji tsürabur mapang nungi Tsüngremi tangar dang nungi lenla aisü nung alia meima aru, asenoki asenok shitak nüchi küma litettsü asoshi mangdang tajung ayutsüla nungtaker, anungji ongpankong nunger kaketshirtem shisaluyimba nung nüchiba kümtettsü asoshi Ongpangkong Kaketshir Mungdang Vision Statement ka küm 15 asoshi renema ayutsü kanga dang tenüngdaksü lirta

Nagaland Legislative Assembly Speaker Wb.Sharingain Longkumerisa lemsatep.

39 Buba OKM Inti Mungdangdi tenzükba sentong nungsa Küpza Baptist Arogo Pastor Rev.T.Moa ajanga Tsüngrem O lemsateper sarasadem, Küpza Village Council Chairman Wb.T.Akok ajanga Mungdang tayongzükba o jembir, OKM Tatong Tir Sb.Sensomeren Longkumeri ajanga tarur metetpelaba mapang agiba den Ongpangkong Mungdang Tir Wb.Lipokmeren Jamir-i tepela o jembir aser Kr.Aosangla Pongeneri ken tajung ka tena mungdangsanger ayongzük.

Ongpangkong Kaketshirtem yimsüng 18 nungi aser district aser jila balala nung OKM telen tenteta alirtem nungi kaketshir 535 adenshia kadagi January 18 nü Minister RD & SIRD Wb.Metsübo Jamir Tongti tesemdang asütsü aser pai OKM mungdang nungo kaket "Limketer" sayatsü aser sentongren balala agiba den January 19 aonung Advisor, Minority Affairs & Sericulture Wb.Imkongmar aruagi mungdang shibangtsütsü.

Sobaliba wazüka ayutsü mechi Mini Hornbill benjong amunger: Advisor Zhaleo



Dimapur, Aenjeti/January 17 (TYO): State sorkari district sasep nung Mini Hornbill benjongmung ayongzüka amungba nukjidong ya kin balala indang sobaliba tajung wazüka ayutsü aser temaba jenjangi ajungketsü asohi lir, ta Advisor, Urban Development & Municipal Affairs, Nagaland, Zhaleo Rio-i ashi.

Tourism Department ajanga sponsor süa "Unity through culture" omen kübok Kuki Inpi Nagaland aser Phaipijan village

council nati Phaipijan yimdak 10 buba Mimkut Mini Hornbill Festival ayongzüka nung tesemdang tongti ama jembidang, Kuki kin asoshi tongtipang kin ya state sorkari state Hornbill Festival nung shilem ka ama agizükogo, ta Advisor Zhaleo-i ashi.

Kuki kin-i Mimkut benjong amungba ya tetenzükba tajung ka lir aser pei sobaliba wazüka yua temaba jenjangi ajungketa tejakleni aoba danga kin dang sayuba lir, ta pai ashi.

Nagaland nung Kuki nunger

nütsüng ajema alitsü akok saka northeast region tesem ajaklen prokshia lir. Anungji Kuki nunger ya kin tila mesüra tongtipang masü ama mezüngshitsüla, kechiaser state terenlok asoshi Kuki nungeri shilem tulu agia lir, ta ashi.

Nüburtem jenti adenshia iba benjong amungba ajanga pei sobaliba akumtsüboba sayur, ta pai Kuki nunger nem tenünsang agütsü.

Iba sentong nung telok balalai sobaliba tsünsang aser ken agi shilem agia liasü.

Tuensang aser Phek nung Republic Day atema senden amen

Dimapur, Aenjeti/January 17 (TYO): Aruya aliba Republic Day atema renemshitsü aser osangtsüsang agiteptsü senden ka Deputy Commissioner Tuensang indang Conference Hall nung January 17, 2024 nü mena liasü.

Iba senden nung Republic Day takok ngua amungtsü atema department balala nem mapa lema agüja liasü.

Deputy Commissioner

Tuensang, Lithrongla Tongpi Rustsa, NCS ajanga ketdangsürtem dang Republic Day sentong nung shilem agitsü ajungshi.

Laisa ketdangsürtem dang nunglokja aliba maparen temulung agüja inyaksü nenshia ashi.

Phek nunga Republic Day atema department balala shisadokden senden ka Deputy Commissioner, Phek, Kuko Mero, NCS lenisüba kübok DC

indang Conference Hall nung January 16, 2024 nü mena liasü.

Phek nung Republic Day mapang department balalai exhibition stall amenotsü asoshi stall yanglutsü atema iba senden nung jembia liasü.

Iba anogomung atema department balala nem iba senden nung mapa lemja liasü.

Deputy Commissioner ajanga heads of offices ajunga dang temulung agüja maparen anir inyaksü ayongzüka liasü.

Shamator nung Tour Guide & Home Stay indang training agütsü

Dimapur, Aenjeti/January 17 (TYO): Yimkhiung Heritage Village Mundun, Shamato nung Tour Guiding and Home Stay atema capacity building training ka January 17, 2024 nü ayongzüka liasü.

Iba sentong ya Tourism Department ajanga Nagaland Tourism Association den lungjemer ayongzüka liasü.

Iba sentong nung shisalen sayur ya Sr. Tourist Officer, Moatemsu Sangtam aser

President, Nagaland Association of Tour Operators (NATO), Kejaroko Pieru liasü.

Iba training nung yimtsüng balala nungi nisung 70 shi arua aden.

Shamator nung Tsungkamnyo cum Mini Hornbill benjong amung



Yimkhiung Heritage Village Mundun, Shamator nung January 16, 2024 nü Tsungkamnyo cum Mini Hornbill Festival amungdang Advisor, Youth Resources & Sports, S. Keoshu Yimkhiung tushiba noksa nung angur.

Dimapur, Aenjeti/January 18 (TYO): Yimkhiung Heritage Village Mundun nung January 16, 2024 nü Tsungkamnyo cum Mini Hornbill Festival munga liasü.

Iba sentong nung Advisor, Youth Resources & Sports, S. Keoshu Yimkhiung ya Special

Guest aser Host ama dena liasü. Iba sentong nung YTC tir Throngso-i tarur pela agizükba o jembi aser Deputy Commissioner, Shamator, Y. Chingyak, ex-MLAR. Tohanba nungeria o tatsütsü jembi.

YGBA tir K. Lakiumong ajanga Tsungkamnyo

benjongmung ratet ashi aser Trung Thulunso ajanga temeja ken ka aten.

Iba sentong nung menden ya Lakiumong, YGOA tir liasü aser Chessore Village Cultural Troupe ajanga sobaliba tsünsang ka agi shilem agia liasü.

Iba Tsungkamnyo benjongmung nung Yimkhiung Tribal Council ajanga T. Belenso nem Yimkhiung Outstanding Achievement Award agüja liasü, shiba Yimkhiung Scientist mezüngbuba aser India Science Technology and Innovation, Government of India kübok Soil Scientist ama shimteta lir. Maneni body building competition nung India tenung nung shilem agiba asoshi Athrong Yimkhiung nema kasa sempet ya agüja liasü.

AHoDS aser HoDS senden thinener

Dimapur, Aenjeti/January 17 (TYO): Secretariat Conference Hall nung January 18, 2024 nikongdang 2:00 ako nungi amentsü aliba Administrative Heads of

Departments (AHoDS) aser Heads of Departments (HoDS) senden tarutsü nung sangdong ka magütsü tashi thinena atar, ta Home Department ajanga sangdong ka nung metetdaksü.

Indigenous games aser sobaliba sentong agi



Tsungkamnyo cum Mini Hornbill Festival nung shilem ka ama Bodhbarnü Yimkhiung Heritage Village Mundun, Shamator nung indigenous games tetoktepba alidang tangokba noksa ka yangi angur.

Dimapur, Aenjeti/January 17 (TYO): Tsungkamnyo cum Mini Hornbill Festival nung shilem ka ama January 17, 2024 nü Yimkhiung Heritage Village Mundun, Shamator nung sobaliba sentong balala agiba den indigenous games tetoktepba agia liasü.

Iba indigenous games asayamung moaja jembidang Chairman, Nagaland Beekeeping & Honey Mission, Obed Quinker-i nüburtem dang

sobaliba wazüka ayutsü ajungshia liasü.

Iba anogo Wochak Khüntung, arr atsütepba, nü tsüshitepba, süngkum nung shimo melanger atuba, mouth organ (Khüngbi), Cross bow (Sanglüh), mezüng khangtepba (Shung Khuachihkhi) aser Khüyih (Aliberü) amala asaya nung tetoktepba agia liasü.

Iba tetoktepba ya Yimkhiung Naga nunger yimtsüng balala tsünga agia liasü.

Niuland District Planning & Development Board senden menogo

Dimapur, Aenjeti/January 17 (TYO): Deputy Commissioner aser Vice Chairman, DPDB Niuland, Sara S Jamir lenisüba kübok Niuland District Planning & Development Board (DPDB) senden Deputy Commissioner, Niuland indang Conference Hall nung January 17, 2024 nü mena liasü.

Iba senden nung district nung aliba department balala nungi Chief Minister's Health Insurance Scheme (CMHIS) indang enrolment asadanga liasü aser department ajak nung enrolment shilem 100 jungnüa agiba jangjatet.

SDO (C) aser District

Sports Council indang in-charge ajanga Niuland nung tang renema aliba Multi Discipline Sports Stadium indang osang agüja liasü.

Iba senden nung PHE Department ajanga department inyakyim osang agütsü.

District nung department-i mapa tajung inyakba atema tenünsang agütsüba mapang DC-i ketdangsürtem dang yimtsüng balala nung bore well inokba maparen shidak inyaker asü masü ta asüngdanga liasü aser department dang community bore well/ community water reservoir amshitsü nüburtem nem awareness agütsütsü ayongzüka liasü.



General area Tizit nung NSCN K (Angmai) telok nungi züngsem kar aliba osang tejangja nung ajemdaker Assam Rifles aser Nagaland Police ajanga January 14, 2024 nü operation agidang NSCN K (Angmai) telok nungi züngsem ka apu. Iba nisungba ya shishilempaba tesemtem aser nüburtem dang nungi tashiyim amshia senotsü meshiba maparen nung shilem agia liasü.



January 17, 2024 nü Kochi nung terenlok project balala semzüksüba sentong nung Ato kilonser Narendra Modi, Kerala Angh Arif Mohammed Khan, Union Ministers- Sarbananda Sonowal aser V. Muraleedharan na aser Kerala Chief Minister Pinarayi Vijayan nungertem tangokba noksa nung angur.

Ayodhya nung Muslim nungertemi police dang security meshir

New Delhi, Aenjeti/January 17 (Agencies): January 22 nü Uttar Pradesh kübok Ayodhya nung Ram tekülem ki semzüksü

lia Ayodhya nung Muslim nungertemi par nütsüng longsoa aliba kiyongtem nung police security peria agüjang, ta takhangba agütsür.

Item kiyong nung Muslim nungertem aser Imam temi Ayodhya nung Inspector General of Police (IGP), Praveen Kumar dang 1992 küm December 6 nü Babri Masjid raksatsüba sülen rara adokba tesemtem nung police security peria agüjang, ta mepishi.

Ram tekülem ki anasa Ramkot kiyong nung alir Muslim nungertem Akhtar Ali-i, "Hindu aser Muslim nungertem Ayodhya nung tesünep nung dang lia aruogo. Ajisüaka tangalen nungi bendangertem aruba sülen iba yimti nung yimjung raksatsü," ta metetdaksü.

Ayodhya nungsa alir Mohd Irfan-i, iba tesem nung alirtemi January 22 nü Ayodhya tesem semdangertemi timtem agütsüsüa akok ta tsübur, ta ashi.

1992 küm rara tulu adokba mapang nung par ki-a rondoka liasü. Uttar Pradesh Police aser Yogi Adityanath-i aniba sorkaria Ram tekülem ki semzüksüba anogo nung lendong mataloktsü atema telemetba aika agia inyakdar, ta metetdaksüogo.

January 13, 2024 nü osangbenertem den jembidang (IGP), Praveen Kumar-i, lendong mataloktsü atema police-i teinyaktsü tim ajak inyakogo; tesem ajaklen CCTV

cameras amenokba den külemi police-i AI technology amshidar, ta metetdakja liasü.

Uttar Pradesh police special task force kati Ram tekülem ki telongtet ajak nung security agütsüsü, ta sorkar ketdangsertemi metetdaksü.

Taoba hopta Central Industrial Security Force-ia tawa semzüksüba Ayodhya airport nunga sepai 150 lemezüksüogo.

Ajisüaka Muslim nungertemeden atema inyaker, Aazam Qadri-i Muslim nungertem longsoa aliba tesemtem nung security akangshitsü nungdak, ta ashi.

Sunni Central Waqf Board, Area Sub-committee nung Tir, Qadri-i, "Ketdangsertemi raliwalirtem aser tamangertem nem security agütsür, ajisüaka ozü nüburtemi tsübur," ta ashi.

Muslim nungertemi IG dang Muslim nungertem aser Hindu nungertem ayongzüksüba block-level officers aser police den külemi senden amentsüla, ta mepishi.

Muslim nungertemisa lendong ataloktsüba aliba kiyongtem- Verma Colony, Tedhi Bazar, Baheliya Tola, Kajiyana, Paji Tola, Dharam Kanta, Gola Chauraha, Saiyad Wada, Gadiwan Tola, Begumpura, Mohalla Katra, Kothi Ghat, Durahi Kuan, Meera Pur Bland Gadiyana, Suthati, Mughalpur, Machuana, Kutuya, Raiganj Gadiyana aser Jaisinghpur nungbo security sepai tali lemezüksüba, ta mepishi.

Parnokisa Ayodhya Police

Station sülen aliba kiyongtem, Tin Wali Masjid, AC Masjid aser Asharfi Bhawan water tank nung security sepai tali lemezüksüba ta mepishi. 1992 küm Babri Masjid raksatsüba mapang nung item kiyong ajunga nung rara adoka liasü.

January 22 nü Ram tekülem ki semzüksüba sentong nungji kanga tongtibang nisung 10,000 dak tema adentsü, iba dak alia linük tesem balala nung Hindu nungertem aika Ayodhya nung adenshitsu imlar.

Lokti tulu adenshitsu, ta bilema state sorkari Shri Ram Janm Bhoomi Teerth Kshetra Trust-i jaokertemi dang January 20 nungi tenzüksüba January 22 tashi nung Ayodhya telungi aittsüla, ta metetdaksüogo.

Osang angazüksüba agi, taoba hopta nungi tenzüksüba Ayodhya tesem ajaklen police-i prangpong aser raraba hadir mita odar.

Ano külen tanga osang ka nung, TMC MP, Dibyendu Adhikari-i shidi ka ajanga Home Minister Amit Shah dang, January 22 nü West Bengal nung rara adoktsüa akok, ta metetdaksü.

Dibyendu Adhikari-i, Chief Minister Mamata Banerjee densema lenirtemi telemsa adokdaksütsü meranger, ta metetdaksü.

2019 küm Dibyendu Adhikari-i TMC ticket nung Lok Sabha election nung toktepa takok angu, ajisüaka 2021 küm nungi tenzüksüba pai TMC sentongtem nung madener aser par party aija arur.

LAC nung India aser China sepaitem anaben rara

New Delhi, January 17 (Agencies): Line of Actual Control (LAC) nung India aser China sepaitem tsüngda anaben rara adokba osang ka jungkai adokogo.

Indian Army-i sepaitem nem tasü aitba awards agütsüba ajanga tamalen anaben tashi rara adokba osang ya jungkai adok.

Taoba hopta Army Western Command-i tetushi agütsüba sentong ka ayongzüksüba agiogo aser iba sentong nungji LAC nung India nungertem sepaitemi tasü itta China nungertem People's Liberation Army (PLA) sepaitem nokdangba indang zünga metetdaksü.

Army Western Command indang headquarters ji Chandimandir nung lir. Parnoki ayongzüksüba agiba sentongji YouTube channel nung upload süja liasü, ajisüaka Hombarnü iba video ji YouTube nungi agienadokogo.

Iba sentong nung awards agütsüba mapang nung zünga metetdaksüba apibo linük ana sepaitem tsüngda anaben rarabaji 2021 küm September nungi 2022 küm November ita tsüngda atalokba lir. Ajisüaka tang tashi nungbo Army-i iba osangji official süa memetetdaksü.

2020 küm June ita nung anüdoklen Ladakh kübok

Galwan Valley nung India aser China sepaitem tsüngda raraba sülen nungi Indian Army-i kilometer 3,488 talang LAC nung sepaitem tali lemezüksüba sepaitem yakyaka lir.


Tesüiba küm asem ser tesadang tsüngda anüdoklen Ladakh nung linük ana sepaitem tsüngda mangatettep aiben adokogo saka parnok tsüngda anaben raraba osang yabo tang ang jungkai adoker.

2022 küm December 9 nü China nungertem sepaitemi Tawang sector nung Yangtse area kübok LAC adena aittsü merang saka India nungertem sepaitemi nokdangteta liasü.

Iba sülen anogo pezünü lir Defence Minister Rajnath Singh-i Parliament nung India nungertem sepaitemi China nungertem nokdangteta osang metetdakja liasü.

Rajnath Singh-i, "Sepaitem tejak chitepa ajurutepeba mapang nung teka sangshitepa rara aser Indian Army temi tasü itta PLA sepaitem nokdangteta parnok post-i meyipa yok. Iba mapang nungi linük anaprongla nungi sepaitem yiru," ta metetdakja liasü.

Tawa Army Western Command-i sepaitem nem tetushi agütsüba sentong nungji sepai aika nem tasü aitba awards agütsüba liasü.



January 17, 2024 nü Kartavya Path, New Delhi nung CRPF 'Daredevils' team-i (tetsürtemi) Republic Day Parade atema renemshidang tangokba noksa nung angur.

Opposition INDIA-i menden lemsatsü

atema mapang agitsü: Lalu Prasad

New Delhi, January 17 (Agencies): Bodhbarnü RJD

tongti lenir aser taoba mapang Bihar Chief Minister, Lalu Prasad Yadav-i, opposition INDIA teloktep nung aliba party tem tsüngda menden lemsatsü atema mapang agitsü, ta metetdaksü.

Paisa, Janata Dal-United Tir aser Bihar Chief Minister Nitish Kumar na tsüngda mangatettep lir ta osang probkaji olulu dang lir, ta ashi.

Osangbenertem den jembidang Lalu Prasad-i, "Teloktep nung menden kera melemsatepteter. Iba atemaji mapang agitsü," ta ashi.

January 22 nü Ayodhya nung Ram tekülem ki semzüksüba sentong nung adentsü atema Lalu Prasad Yadav-a jaoka lir, ajisüaka pai iba sentong nung

madentsü.

Osangbenertem den jembidang pai, "Ram tekülem ki semzüksüba sentong nung adentsü atema ni Ayodhya-i maotsü, ajisüaka khen lir ang Ram tekülem ki semdangtsü," ta metetdaksü.

Paisa, pai shidi ka ajanga Ram Temple Trust züngsem Champat Raidang dang pa iba sentong nung medentetba kuliji metetdaksütsü, ta ashi.

INDIA teloktep nung densema aliba opposition party temi senden aika mena aruaka Lok Sabha election atema parnok tsüngda menden melemsatepteter.

Tesüsabuba senden nung Indian National Developmental Inclusive Alliance (INDIA)-i Congress Tir Mallikarjun Kharge Chairperson shimogo.



January 17, 2024 nü INS Shivaji, Lonavala nung Indian Navy Chadar Trek (Frozen Zanskar River, Ladakh) expedition tenzüksüba sentong nung Chief of the Naval Staff Admiral R Hari Kumar den tangartem tangokba noksa nung angur.



TIR YIMYIM YIMOBILEM (EDITORIAL)

DIMAPUR YANGTEPNÜ, JANUARY (AENJETI) 18, 2024

Yimten o angatsü sentepba lokti

Nagaland nung mapang talangka yimten teloki ayongba senden nung nisung longsua adenshiba mengudangi aruba yashi aser yakanü Congress lenir Rahul Gandhi Kohima nungi Wokha ajanga Mokochung district süiba mapang yimti yimdong aser lenjem nung pa o angatsü atema nübortem lokti tulu küma adenshiba ngua süngmanga reprangogo. Atangji, aji tesümgangtsüka, kechiyong Nagaland nung yimten teloktemi yamala nübortem lokti tulu küma adenshidaktsür yimten onük jembiba küm aika mengui aruogo. Tanga mapangjibo yutsür, election mapanga asen lima, talisa Mokochung nungbo lokti senden tulu lia 'party manifesto' nung nangzüka aliba onüktem jembitsü asoshia lokti senden malir aser aliyonga nübortemi jangrabangraa marur. Aji oda, tang Rahul Gandhi süidang kima yimdong nung asüyonga lokti tulu adenshia pa o angaba amaji asen lima, talisa Mokochung district nunga yimten teloktemi ayongzüka lokti senden nung nübortemi nübo aser mapang tenla agüja aden nungbo koda jungla ta bilemer. Atangji, Congress teloki ayongba Bharat Jodo Nyay Yatra süiba reprangtsü adenshiba nübortemji Congress telok nung adenertem masütsüa akok saka teimbaka Rahul Gandhi reprangdangtsü aser pai jembiba angadangtsü asoshi sentepba purtem asütsü. Ajia junger, kechiyong Rahul Gandhiji Indira Gandhi'er semchir aser Rajiv Gandhi'er jabaso aser tanubur süaka Congress nung tongti lenir ka lir, anungji paji tereprangdangnüsüka aser pai jembiba oja tanganüsüka. Paji tetsü Indira aser tebu Rajiv ama o nung tsüngru tasong aser o jembiba tashibo masü, saka temeimtsüka aser pa dak nübortem meimba aser linük tenzüknüba jakla aser shisatsü keta aliba angur. Iba ama lenir kati kechi jembir aser nübortem dang kechi ashitsü ta anganüa nübortem adenshiba ama, asen lima nung asen nisung, asen candidate aser aser lenirtemi ayongba senden nunga nübortemi jangrabangraa arua angatsüsa asenok yimten lenirtema alitsüla. Kasaji, Rahul Gandhi reprangtsü aser pai jembiba angatsü atema peisasa mulungteter pei nübo, pei mapang aser pei rongsen endoka adenshiba ama, asen lima nung kodangsa yimten teloktemi lokti senden ayongdir peisasa mulungteter oagi senden nungji shilem agitsüla. Yimtenji asen meyong aser yimten telok (political Party) ka nung adentsübaji asen mulung , ajisüaka asen adenba yimten telok nung lenirtemi asenok ajak ki tonga aruagi yimten ken o lemsateptsübaji asenoki meimlatsüla, kechiyong aji tamakoktsü, ibayongji yimten teloktemi lokti senden ayongzüka pei yimten aser lokti tangatetba, tebilemba aser telemtetbatem lemsateper. Ajisüaka, asen lima nung, talisa, election mapang nung yimten lenirtemia lokti senden ayongzüka pei telok aser kija tebilemba, tejangraba aser nükjidong ashitsüba nung temulung magütsür aser nübortemia yimten teloki asenok atema kechi inyaksütsü (?) ta asübaji masü, saka vote tsüda sen kwi agütsür ta bilema kidang dang atar. Tangbo election mapang masü, anungji nisungtem mulungjang nung shiba dang kechi meshitsü (?) ta asüba tebilemba to mali ser yimten ken o jembiba angatsü sentepogo. Iba kasa tangatetbaji election mapang aser election masüdanga asenok dak alitsüla. Ashiko, Rahul Gandhi-to election mapang ka arur asübo, nisung paikatobo madenshila, kechiyong pai sen agi vote malitsü aser sendeni arutsü asoshia bara magütsütsü. Asenok ya loktii mulungba nung telemtetba agiba aser yimsüsüba lima nung alir, anungji lokti senden lia yimten aser lokti ken o benoka jembiba sobaliba ya asentenshitsü kanga nüngdaka kümogo. Asenoka joko kodang election arudir, election nung yimten lenirtemi jembiba o angatsü yongyaa atadi aser lenirtemia lokti senden nung nübortem den jembitsü onük renema atatsüla. Sen agi vote alia MLA akümba ya masü mesüra sen yong vote yoka chia election nung shilem agiba loktia masü, saka lenirtemi nübortem nüngdak reprangteta lokti senden nung jembiba aser nübortemi teindang shisatsü (righteousness) agi yimten sentong nung shilem agiba ajanga dang asen kin aser asen lima ajungkettsü.

OLEMSABANG

Tanü nüburtemi linük meimba yimsüsür aser lennir aginür

~ L. Kika Pongener.

(Yashi adok nungi...)

Tanü asen lima nung yimsusur aser lennir aika rongsen aser supokrem nung alanger, metetsümonga ochi paitoker obendang agütsür. Yimden aser loktiliba nung yimsusur aser lennir-i ozüng raksara, iba bangdak/ iba lokti nungji ozüng raksar tali züintsü, kechiyong nutsüng nuburi yimsusur aser lennir tsüngken metsübui akümtsü. Tsüngrem oi ashir... "Temenenpur bangdak ozüng raksar züiner" (A. Shin-29:16). Aji oda, Yimsusur aser lennir-i anir ozüng raksara iba yimsusuba bangdakji nubur-i akümmetsübutsü aser ret-reta magitsü.

Atangji, tanü asen lima nung yimden bangdak aser loktiliba nung yimsusur aser lennir-i, jakdak-jakdaka tejak repranga yimsu asüba aser lokti aniba agi, asen lima nung yimjung aser tesunep malir. Aji oda, tanü asen lokti nung, küsa mapa ka nung, küsa aibelen sernung, karbo tiyazü küli agi mimbanga ayutsü aser karbo tashiyim agi taochi maket merenshira...ajibo tajitetsü/tashishitsü keta inyakba mapa aser tanak-temesung bendanga inyakba mapa asütsü. Aji oda, iba amaji jakdak-jaktaka tejak repranga inyakra...Nisung tsüngdang medenyongjia Tsüngrem tsüngdangbo memedentsü. "Tiyazü küli memerenshi-i malitsü" (A.Shin-19:5). Atangji, koba linuk nung yimsusur aser lennir-i ochishia yimsu mesulir...Iba linukji azükaro masütsü aser nuburtem sunepa malitsü. Koba linuk nung yimsusur aser lennir-i supokrem nem anidaktsüdir, iba yimdenji azükaro masütsü aser arishia nokdaka malitsü. "Chuba shibai tamangtsüsa sensaker o shitak bendanger, pa chuba mendenji teti asoshi yanger-a alitsü" (A.Shin-29:14). "Nenok o mebendangtsüsa nenoki o tebandang; Kechiaser kechi o bendang agi nenoki bendangdir; Nenok o yamaji bendangtsü" (Mathi-7:1). Yimsusur aser lennir-i angatetsübaji...Tanübo aseni kechi o kazüka yoker yangji atemer...Saka tashiyim agi tashi amshia o bendangra asen dangi meyipa arulanglang.

Tanü asen Naga lima nung yimden yimsusur aser lokti-tentet balala nung lennir karbo rongsen ketdangsuba nung jaktak-jaktaka ochimashi aibelenba putetyongjia, parnok aküm dak tsükdaker, mesura tejak repranga, kecha meshi-i toktsüba ngua nuburtem kanga aoksar...!!!??? Yimsusur-a suang, lennir-a suang, shiba sudir suang, aibelener-bo aibelener ka ama arrtsütsüla. Aji oda, aküm-sentsü-aketer apia mimbanga yura, iba yimden bangdak aser lokti-ji nuburi ret-reta magitsü. Tsüngrem oi ashir, "Tangartem-ia tsübutsüsa temenen beshirtem yimjak manung arrjang" (1Timoti-5:20). Anungji, tangar-ia tsübutsüsa, aibelenerbo yimjak nung arrtsütsüla. Aji oda, jaktak-jaktaka aibelenba puteter, aküm-sentsü-keter apia mimbanga yutsüra, tangar tanungba lennir-ia tarentak-tetsübu meli-i ochimashi inyaksü temulong ulutsü, Kanga tesasatsüka, tanü yimden aser loktiliba nung, aküm-sentsü-keter dak tsükdaker, aibelener dang aibelenogo ta meshiteter...Ajisuaka, nisungi kecha meshitet-aka Tsüngrem-ibo shitetsü...Saka Tsüngremi ashibajibo tesasatsüka asütsü. Tia makara...Tsüngremi pa/la tenzüka mapa nungi teti atema sodi agüja-adoktsü. Anungji, yimsusur aser lennir ajaki nisung nungi masü, saka Tsüngrem nungi temeden angutsüsa ochishia tenzüksüla. "Saka tamajunger linuk nungi leptoktsü aser ashikülaker tera nungi attsütoktsü" (A.Shin-2:22). Tanü asen nuburtemi linuk aser nubur meimba ochishir yimsusur aser lennir aginür.

Küm tasen naklu

~ C. Lima Ozüküm Mongsenyimti

Züngoka maliba narjung ka
Yimkong watidak pangmong mangu
Anguzüka malu atepzüng anüker
Ohoi ta ki temshia jadanger mali
Rongjenseta amoker mitsüng remer
Shiri züngshitsü sentsü maiter
Sensamasa mesenmetur melang
Pur panger kümsen pelateper
Tanu tain sübusen den naklur
Kiyong kidanger aomen kentsüteper
Ita Anüi tatsü talang mebendang
Atsü-akong ajak nung yaloktsür
Nisungi ya beshilasang
Alimai küm tasen aru langrepla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Khristantem tamajungtiba reshikangshiba linükji North Korea lir



January 17, 2024: Khristan melungtet telok Open Doors-i World Watch List 2024 sangdongogo aser iba list nung alima nung Khristantem tamajungtiba reshikangshiba linük tamajungtiba 50 metetdakja lir.

2024 küm report nunga alima nung Khristantem tamajungtiba reshikangshiba linükji maneni North Korea sa lir; tesüiba küm 23 tsüingda taküm agi küm 22buba Khristantem tamajungtiba reshikangshiba linükji North Korea lir.

Kasa report nung Open Doors-i China linüki North Korea nungi jena arurtem tanaben meyipa yoktsü maparen tasen ka tenzükba metetdakja lir.

Open Doors-i ashiba agi, tang alimai Israel aser Gaza na tsüingda raraba nung dang rangloker, ajisüaka China-i North Korea nungi jena arur North Korea nunger 600 shi October 9, 2023 nü North Korea-i meyipa yokogo.

North Korea-i meyipa yokortemji teimbaka tetsürtem lir, anungji parnok kanga reshikangshia alitsüa akok, ta Open Doors-i metetdaksü.

"Parnok meyipa aoba sülen reshikangshia alitsüa akok aser concentration camps nung mapa tasak inyadkaja alitsüa akok," ta Open Doors-i metetdaksü.

Ajisüaka sub-Saharan Africa densema alima tesem balala nunga Khristantem reshikangshiba atema Open Doors-i tebilemtsü akar. Talisa Nigeria nung Khristantem meshimeshia samatsütsü meranger, ta kasa report nung shia lir.

Yaküm sub-Saharan Africa nung Khristan 4,606 tepsetba osang jangjaogo, ajisüaka Khristantem tepsetbaji iba dang nungjagi teimba asütsüa akok.

"East aser west Africa nung Jihadist telok balalai nütsüing ajema aliba Khristantem anema inyaker aser region alema oor sorkartemia ibaji pusemer," ta Open Doors-i metetdaksü.

Taküm World Watch List nung alima nung Khristantem tamajungtiba reshikangshiba linüktem rongnung Burkina Faso jenjang 20 buba nung lir,

Mali jenjang 14buba, Mozambique jenjang 39buba, Nigeria jenjang 6buba aser Somalia tanabuba jenjang nung lir.

Open Doors-i, sorkar aser security tashimaitba ajanga Jihad kiralongrartem nem lenmang sadema lapoktsür, ta aitsü.

"Sub-Saharan Africa tesem ajaklen Islamic kiralongrartemi sorkar tashimaitba ajanga iba nungjagi maongka agir. Parnok nukjidongji regions aser linüktem Islamic caliphates nem agüja Islamic Sharia ozüing kübok yimsü südaksütsü atema lir," ta report nung shia lir.

Open Doors-i, talisa Nigeria atema tebilemtsü katsür, kechiyong alima nung Khristantem tepsetba shilem 82 bo Nigeria nung lir, ta metetdaksü.

Open Doors UK & Ireland nung Chief Executive, Henrietta Blyth-i, "Sub-Saharan Africa nung Islamic kiralongrartemi Khristantem anema inyakba kanga bulua kümogo. IDP camps nunga Khristantemi tsübur, kechiyong Khristantem meyong li nung parnok shiruru chiyimdaksür mesüra alu nungi auyar," ta metetdaksü.

"Iba region nung sorkartemi nüngdakba mera agia inyaksüla. Yamaji meinyakra Khristantem samatsü," ta paisa metetdaksü.

Open Doors-i, tang alima tesem balala nung Khristan million 365 shi reshikangshiba tesemtem nung lir, ta metetdaksü.

Alima nung Khristantem tamajungba reshikangshiba linüktem rongnung India-a jenjang 11buba nung lir. 2022 küm India nung Khristan 17 tepseta liasü saka 2023 küm nungbo Khristan 160 tepset aser ibaji talisa Manipur nung rara ajanga lir.

2022 küm India nung Arogo aser school tem amakba tatalokba 67 liasü saka 2023 küm nungbo item ama tatalokba 2,228 liasü, ta report nung shia lir.

Manipur nung rara ajanga Khristan 160 tepset aser nisung 62,000 shi jenshi. Parnok teimbaka tang tashi camps nung jenoka lir aser kidangi meyipa aotsü teimla mali.

Manipur nung Khristan lenir, Chung Mang-i, "Meitei nungertemi ita ishika jelia raraba mapang nung raksatsüba ki aika nung temeren agi longteta aser kangki temaitsü inokja liasü ta onoki metetogo. Iba ya ita aika jelia sentong yangluba liasü," ta metetdaksü.

World Watch List Open Doors' 2024 report nung alima nung Khristan tamajungtiba reshikangshiba linük 50 ji- 1 North Korea, 2 Somalia, 3 Libya, 4, Eritrea, 5 Yemen, 6 Nigeria,

7 Pakistan, 8 Sudan, 9 Iran, 10 Afghanistan, 11 India, 12 Syria, 13 Saudi Arabia, 14 Mali, 15 Algeria, 16 Iraq, 17 Myanmar, 18 Maldives, 19 China, 20 Burkina Faso, 21 Laos, 22 Democratic Republic of Congo, 23 Mauritania, 24 Morocco, 25 Uzbekistan, 26 Bangladesh, 27 Niger, 28 Central African Republic, 29 Turkmenistan, 30 Nicaragua, 31 Oman, 32 Ethiopia, 33 Tunisia, 34 Colombia, 35 Vietnam, 36 Bhutan, 37 Mexico, 38 Egypt, 39 Mozambique, 40 Qatar, 41 Cuba, 42 Indonesia, 43 Cameroon, 44 Brunei, 45 Comoros, 46 Tajikistan, 47 Kazakhstan, 48 Jordan, 49 Malaysia aser 50bubaji Turkey lir.

UP kübok Jaunpur nung Jeevan Jyoti Mission Tenla ki shibangtsüogo

January 17, 2024: Yaküm September 29 nü Uttar Pradesh kübok Jaunpur district nung pastor Durga Prasad Yadav den Khristan ana apuba sülen tang tashi par asemprong jail nung lir aser tangbo Jaunpur nung aliba Tenla kiji shibangtsüogo.

2018 küm July ita nungi Hindu yimsü alia amangertemi Pastor Durga-i aniba Jeevan Jyoti Mission Arogo dak tenük yoka liasü aser tangbo iba Tenla ki shibangtsüogo.

Iba Tenla kidang ozüing alema tangartem Khristan yimsü dangi meyipdaksür, ta 2028 küm tai tongloktsüba sülen police-i pastor anema ken o benoka liasü; iba mapang nungjagi tenzükba pastor aser Arogo nung züingsemtemi timtem ajangshia arur.

ANOGO ABEN TSÜNGREM DEN

Ateta Atsüingba Tsüingrem O

Kechiaser Tsüingrem O taküm aser teinyak aser anatsü nok ajak dang nungi techiraba; aser taküm o tenüingla ya ajak ateta tsüingba bendangtet aser temulung tebilemba aser tasa asaba yakta metetba.

Ibri 4:12.

Tsüingrem Oi na mesüingzüktetti kümdaktsür asü? Kodang nai Laishiba azünger, nai azüingba Lai tekong jagi na mesüingjemi kümdaktsür asü ? Kodang nai sermon angadir, Lai jagi ne den jembir ama nai bilemer asü? Nai Tsüingrem Oji taküm aser nai bilemba ajak bendanger ta nai metetta arur.

Kodang Tsüingrem Oi ne den jembir ibai teti nukjitong ka asoshi jembir. Tsüingremi ne mulung aser na Khrista den akanga sendaka alitsü asoshi na kechi nüngdaker aji metet. Nai temenen indang jembiba tebilemtsü kar lira, ne dangi aruba Oji temeli ajanga arur. Nai tatok agütsütsü merangya lira Tsüingremer jenjang nung tatok agütsütsü o jagi sayutsü. Asükümüji ne taküm nung kamdong takang ka lir. Tsüingrem ne den ajemtsü atema jembitsü. Kechi temenen indangsa jembidir jembang, iba mapa ajak na Tsüingrem ajanga nokdanger.

Ne tamang nung mesüingjemetetba paidoktsü lenmang kaji Tsüingremi ne den jembiba mangai toktsübaji lir. Nai Laishibaji mezüing toktsütsü akok aser kong iba o sayur iba nung jagi pilaa alitsü akok. Shirnoki ibai soter ta nai metet, nai parnokji sentoktsü akok. Tajungtiba telangzübaji ken zülur sarasademji lir: "O Tsüingrem, kü dak bushiang, aser kü mulungjang metetangma: Ni tendangang, aser kü tebilemba metetangma" (T.Ken 139:23). Maneni Tsüingrem O jagi ne mulungjang shidokjang aser temenen kar ta lira bushitettang (Ef. 5:26). Teti ne taküm aser Tsüingrem O ajanga ne dang kechi ashir ana tsüingdaji sendaktepa ali bilemang. Tsüingrem O-i ne tebilemba aser ne mulungjang metetter ta metetta Tsüingrem O ajakji süoki ia agitsü yimya kuma alitsü merangang.

Mapang ka nungbo iba Jitendra Kumar, Surendra Tenla kidang Amongnü shia Gautam aser Usha Devi nisung 5,000 dak tema nunger apu, ajisüaka tekülem adenshia liasü.

Yaküm September 12 nü pa anema First Information Report (FIR) ka benoka liasü.

Uttar Pradesh Prohibition of Unlawful Conversion of Religion Act, 2021 ozüing kübok Durga den Govind Lal, Jitendra Kumar, Surendra Gautam, Usha Devi aser Pastor Shraavan Kumar nunger anema ken o benok aser tang tashi parnok nem bail magütsür.

Nisung ka tenüing agi Ram Janm Yadav-i Khristantem anema ken o benok. Ram Janm Yadav ya police station ka nung Sub Inspector lir.

Ram Janm Yadav leniba nung Vikrampur Arogo mita aoba mapang Govind Lal,

Surendra Gautam aser Usha Devi nunger apu, ajisüaka tekülem sentong nung o tejembidak mapang nung Pastor Shraavan Kumar bo jena oteta liasü.

Sub Inspector Ram-i, iba Arogo nung lenirji Bhulandih (kilometer 55 pilar aliba) nungi pastor Durga Prasad Yadav lir aser Khristan yimsü dangi meyipdaksütsü atema pai sen aser osettsüset balala agi tangartem mesüzüker, ta tai tonglokja liasü.

Ram Janm Yadav leniba nung police-i Tenla kidang nungjagii Laishiba 9, Tasen Lai ka, dairy ka, poster 98, pamphlets 138 aser Khristan kaket tila 293 den Tenla kidang aliba kongki balala, loudspeaker, pen drive ka aser mobile cable ka pua liasü.

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Shiretzük

(n) teret agi yangluba azük (necklace made of bone)

* Naga nungeri shiretzük kanga sapua agir.

Shirishir

(n) shiruru arishia khasettsü aser tepsettsü merangba nisung (hunter)

* Shirishiri timtem arema arem nung ola madoki shi anüker.

OLONG PAITEP # 6670

1		2				3		4		5
				6						
		7		8						
9					10			11	12	
				13		14	15			
16					17			18		
				19		20				
21		22								23
24										

TIPIEN

- 1. Saku - (4)
- 6. Songjen - (7)
- 7. Mali/Tazüing - (4)
- 9. Tasen apok - (6)
- 11. Songtem - (3)
- 13. Ata liasü - (5)
- 16. Tzünglu den külemi tsüker - (3)
- 17. Aso tila - (6)
- 20. Tashi maküm - (4)
- 24. Tenüing kasa jatepba - (7)
- 25. Ki yangluba oset - (4)

LANGTSÜNGLEN

- 1. Taksep - (3)
- 2. Langtem - (5)
- 3. O tamendaktak - (4)
- 4. Nütsü tebuba - (3)
- 5. Anüingdang tesangwa - (3)
- 6. Apitet - (5)
- 7. Yagi jungdaksür - (4)
- 8. Anogo semer ka - (3)
- 10. ___ tatsü - (3)
- 12. Tebur kidong aser züing kasatsüingdajatepba - (4)
- 14. Pela agizükba tapu ka - (5)
- 15. Tenüing atet - (3)
- 18. Mejanga onü - (5)
- 19. Talak techira - (4)
- 21. Maneni - (3)
- 22. Nübo teyi - (3)
- 23. Meshi - (3)

OLONG PAITEP # 6669 TELANGZÜBA

TIPIEN :

- 2. Pongsen, 5. Lepko, 7. Omen,
- 8. Maongka, 10. Yangkhu,
- 12, Senpong, 14. Angu,
- 15. Raksa, 16. Arameso,

LANGTSÜNGLEN :

- 1. Alimang, 2. Pongen,
- 3. Samaru, 4. Nün, 6. Pio,
- 9. Nüingdak, 10. Yongya,
- 11. Kongro, 13. Ora, 14. Ata.

NAI-A YA METETTER MA



Kerala tsür kati oshi 100 tema agi ken atenba atema Guinness World Record ka ngutetogo. November 24, 2023 nü Suchetha Satish-i Dubai concert ka nung oshi 140 tem agi ken aten. Iba kenten sentong ya 'Concert for Climate' ta ser agi aser Instagram nung la indang video prokshia liasü.

Rahul-i Majuli semdangtsü aliba atema Congress renemshir



Majuli, January 17, 2024

(Agencies): Rahul Gandhi-i Majuli semdangtsü aliba atema Assam Congress-i maparen renemdar. Bharat Jodo Nyay Yatra Assam leg nung iba ya tongtipang shilem ka asütsü.

Nagaon MP Pradyut Bordoloi-i anir Congress lennirtemi Majuli nung Auniati Satra semdang aser idakji Satra head (Satradhikar) semdang aser pa dang Rahul Gandhi-i Vaishnav monastery semdangtsü aliba osang lemsatetep.

"Rahul Gandhi-i Majuli nung Auniati Satra semdangtsü kechiyong küm aika tejakdang

Satradhikar temi India nung mezüingbuba Prime Minister aser Rahul Gandhi tetsü tebou Jawaharlal Nehru Satra-i jaoka liasü" ta Bordoloi-i ashi.

Rahul-i Satra semdangtsü aser Majuli nung amongdang tanga Satra tem semdangtsü ta paisa ashi.

"Rahul Gandhi-i kanga meranga Majuli semdang. Pai Nagaland nungi Assam-i arutsü. Pai rong ka nung mener Majuli-i arutsü aser idak nungjagi Arunachal Pradesh-i aotsü. Pai Majuli kanga akhümtsübur aser pai Majuli khen danga mesemdang. Satra tekolakbai jaokba ajanga pa arur anungji pai

Auniati Satra-i arutsü. Paisa tanga Satradhikar tem den ajuruteptsü" ta Bordoloi-isa metetdaksü.

Assam nung BJP sorkari tenokdangtsütem agütsür. Assam nung Rahul-i Bharat Jodo Nyay agiba nung nisungtem medendaktsütsü meranger ta Nagaon MP-isa ashi.

"Sorkari tenokdangtsü balala agütsür. Rahul Gandhi arudang nübertem medendaktsütsü atema parnoki ration cards alemba amala sentongtem agir. Parnoki Rahul'er sentong nung shilem magidaktsütsü meranger" ta Bordoloi-isa ashi.

Rahul Gandhi-i rong ajanga Majuli-i aotsüba memelatsü akok ta osangtem lir.

"Rong dang masü saka parnoki sentong ajak atema temelaba magütsür. Parnoki onok tesem aikati meyoker. Onoki Jorhat adena aotsü akok saka Guwahati adena moutettsü ta ashir. Parnoki khuret aika agütsür saka onoki tebilemstsü mabener" ta Bordoloi-isa ashi.

President Murmu-i Diphu semdangtsü aliba athi

Diphu, January 17, 2024

(Agencies): President Droupadi Murmu-i Assam kübok Diphu semdangtsü aliba sentong thiogo.

"Tsüingsang majungba ajanga President Murmu-i Diphu semdangtsü aliba athir" ta Karbi Youth Festival nung Assam Chief Minister Himanta Biswa Sarma-i ashi.

President Murmu-i tanü

Diphu nung Karbi Youth Festival hon jubileemong nung adentsüba liasü. Assam Governor Gulab Chand Kataria-ia tsüingsang majungba ajanga iba sentong nung medentet.

"President-i jembiba angatsü aser Karbi Youth Festival hon jubileemong amongtsü atema nübertem adenshia lir. Saka tanü Karbi Anglong tenemtem madak

mepet kanga alaba ajanga President Murmu-i Shillong nungi Karbi Anglong nung arua manenzüket. Külen Governor-isa Guwahati nungi marutet" ta CM Sarma-isa ashi.

"Iba ama sentong tulu ka nung medentetba atema temulung raksar saka President-i Shillong nung la onük record ser onok dangi yokogo" ta Assam CM-isa ashi.

Meghalaya minister AL Hek-i Amit Shah den ajurutepnür

Shillong, January 17, 2024

(Agencies): Meghalaya cabinet minister AL Hek-i Union Home Minister Amit Shah den inner line permit (ILP) onük lemsateptsü atema ajuruteptsü mapang meshiogo.

Meghalaya nung ILP yakta tenzüksü takhangba agütsür

asere ibaji talisa railways operation metenzükdangsa tenzükdaktsünür.

Meghalaya minister Hek-isa Khasi aser Garo oshitem Indian Constitution nung Eight Schedule kübok dendaktsütsü onük jembitsü.

Union home minister Amit Shah-i North Eastern Council

(NEC) senden anitsü atema January 19 nü Shillong semdangtsü sentong lir.

Meghalaya nung ruling aser opposition party tem nungi lennir aikati Constitution of India indang Eight Schedule nung Khasi aser Garo oshitem dendaktsütsü atema takhangba agüja arur.



January 17, 2024 nü Manipur Congress teshimtet telok kati Governor Anusuiya Uikey den ajurutepdang agiba noksa angur. Taoba chief minister Okram Ibobi Singh, Congress state unit president K Meghachandra, taoba deputy CM Gaikhangam, taoba minister K Ranjit Singh aser taoba Speaker T Lokeshwar Singh nungeri Governor Uikey den Moreh nung khatepba indang onük lemsatetep.

Iran-i Pakistan nung telungpur telok ka amak

Tehran, Aenjeti/January 17 (Agencies): Iran-i ashiba agi, parnoki Pakistan anüolen telungpur telok ka makogo. Iba hopta Iran-i, Iraq aser Syria nung missile aser drone amshia tesem kar amakba sülen tang Pakistan nung tesem kar makogo.

Iran indang state TV-i ashiba agi, parnoki Balochistan nung Jaish al-Adl telok pur tamendakdak tesem ana maka liasü.

Kasa mapang nung Pakistan nung ketdangsürtemia iba lendong nung tanur ana asüba aser nisung asem tashi yiruba osang metetdaksüogo.

Islamabad-i ashiba agi, iba tesem amakba ya ozüing alema lir aser iba ajanga tensa mejungi akümtsü akok ta tekümdangtsü metetdaksüogo.

Gaza nung Israel aser Palestine na anogo 100 dak tema raraba aser US o UK nati Yemen nung Iran-i teyari

agütsüba Houthi telok amakba ajanga Middle East ajunga mesüingjemteti aliba mapang ka nung tang Iran-i Pakistan nung iba tesem ana ya makogo.

Mongolbarnü Pakistan kübok Balochistan province nung yimtsüing ka maka liasü. Tehran-i ashiba agi, parnoki Jaish al-Adl, mesüra "army of justice" telok dak rangloker iba tesem maka liasü. Iba telok ya ethnic Baloch Sunni telok ka lir aser parnok yagi Iran-i ia tesem balala amakba den Pakistan sorkar sepaitem maka arudar.

Kasa mapang nung Hombarnü Iran-i ballistic missile amshia Iraq kübok Irbil yimti maka liasü, koba US-i aitsüogo.

Iran indang Revolutionary Guards-i ashiba agi, parnoki Iraq kübok semi-autonomous Kurdistan Region nung Israel indang "spy headquarters" ka maka liasü. Iba lendong nung

civilian pezü asü aser nisung trok tashi yirua liasü, ta local ketdangsürtemi metetdaksü.

Iba sülen Iran-i Syria kübok Idlib province-a maka liasü, kong linük nung tatembangbuba opposition telok amenoka lir aser iba tesem nung nisung million 2.9 shi jenoka lir, shirnok aika camp tem nung lidar.

Iran-i Revolutionary Guards-isa, iba ita Iran nung general Qasem Soleimani, US-i tepseter küm pezü ajungba anogo lokti senden ka nung pei temang nung bomb alenoker podaktsürtemi nisung 84 tepsetba atema telangzüba agütsütsü asoshi Syria maka liasü, ta ashi.

Pakistan kübok tesem balala amakba ya Islamabad-i aitsüogo aser ashiba agi, Pakistan aser Iran na tsüingda tongteprateptsü asoshi lenmang aika lir ajisüaka iba tashi atalokba ya tebilemtsü ka keta lir.

SÜR KÜM KA ABENSAR

18/01/2023



Asür Watinungsang Pongen (Chuchuyimlang)

Anogo aser Putu süitema aotsü Saka nü mapa tajungtem teti onok den lir. Na kodanga mamai onok molungjang nung alir.

- Kinungtsü, Chirnur, Semchir, Kinungertem



JOIN INDIAN NAVY
An Ocean of Opportunities

Tongtipang temetetsü:
Course Tenzüksü : Jul 2024
Online Application agütsütsü atema Last Date : 20 Jan 2024

- Eligibility Conditions:**
- **Educational Qualification :** 10+2 den Physics, Chemistry aser Mathematics nung tajemba agia 70% aser English (class X mesüra XII nung) tajemba agia 50% marks alitsüla
 - **Age :** 02 Jan 2005 aser 01 Jul 2007 tsüingda asor asütsüla (anogo anaprong densema).

Training:

- Shimtetba candidate tem Applied Electronics & Communication Engineering, Mechanical Engineering, mesüra Electronics & Communication Engineering nung küm pezü B.Tech Course atema Cadets ama anioxtsü.
- B.Tech Degree ya Jawaharlal Nehru University (JNU) ajanga agütsütsü.
- Training sen ajak Indian Navy-i menoktsü.



WHO CAN APPLY
Candidates who have appeared for JEE (Main) - 2023 exam (for B.E/B.Tech)
Visit www.joinindiannavy.gov.in

Note

- 10+2 (B.Tech) Cadet Entry atema visual standards melenshiogo. www.joinindiannavy.gov.in nung tejangja angutsü.

INDIAN NAVY - COMBAT READY, CREDIBLE, COHESIVE AND FUTURE PROOF

Office of the **AO RIJU**
MOKOKCHUNG : NAGALAND - 798601
"Kenozülu Yinsem"
Date: 17-01-2024

AO RIJU SANGDONG

Ao Rijui achaayanga agiba Arangtet Tatidang 2024 Aenjeti, 23-25 tsüingda tekübok agüja aliba tesemtem nung agitsü metetdaksür.

a) Mokokchung : Model Hr.Sec. School, Arkong
b) Kohima : KABA, Chandmari Fellowship S.S Hall

Temetetsü:

a) Mokokchung nung agütsütsüpur Admit Card, Aenjeti 22, 2024 anogo office mapang angutsü.
b) Kohima nung agütsütsüpurtem Admit Card tatidang agitsü anepdang, 9:00-9:30 ako tsüingda Admit Card angutsü.
c) Anogo shia tatidang mapang, anepdang 10:00 ako nungi nikongdang 1:00 ako tashi alitsü.

Sd/-
(Prof. Rev. Rongsen Longkumer) Mendenbuba

Sd/-
(S. Wati Ozüküm) Tongti Zülur

Kharkiv nung Russia nung indang missile agi nisung 17 yirutsü



Kharkiv Regional Administration ajanga agütsüba noksa ka nungya Russia nungeri rocket amshia amakdang Kharkiv, Ukraine nung nisung aliba ki ka raksar aliba angur.

Kyiv, Aenjeti/January 17 (Agencies): Russia nung indang missile tem agi Kharkiv yimti nung nisung aliba kitem dak kongshiba sülen nisung 17 yiruogo aser parnok rongnung anabo kanga mejungi yirur lir. Regional Governor Oleh Syniehubov-i ashiba agi, S-300 missile ana agi Kharkiv yimti

tiyongtsüing nung nisung aliba kitem dak Mongolbar aonung kongshia liasü aser nisung 14 tashi temang anepalutsü atema mozükidangi anirogo. "Tetsür ana kanga mejungi yirur lir," ta pa Telegram nung sangdong ka ajanga metetdaksü. (Maneni tapak 8 nung...)

Tesüiba ghonda 24 tsüingta Gaza nung nisung 163 tepset Gaza City, Aenjeti/January 17 (Agencies): Tesüiba ghonda 24 tsüingta Israel-i Gaza amakdang nisung 163 tepset aser 350 yiru, ta Gaza indang Health Ministry ajanga ashir. Nisung aika ki o jen teraksa agi nembanga lir aser magizükteter, ta ministry ajanga Telegram post ka nung ashi. Tang tesüsa amakba nung

asürtem densema Gaza nung October 7 nungi tang tashinung nisung 24,448 tepsetogo aser 61,504 yirua lir. Gaza south tsütsü Khan Younis nung Australia nung timba aliba tesem ka nung Israel-i injang tulu khalokja bulldozer amshia nisung aliba tesemtem, facility balala aser ki o jen aika raksatsüogo. (Maneni tapak 8 nung...)

CBC 1070/1/13/0021/2324

Ranji Trophy: Mizoram aser Nagaland na draw asü



Dimapur, Aenjeti/January 17 (TYO): Tang asaya aliba Ranji Trophy nung Nagaland team tanabuba asaya Mizoram den asaya koba draw nung tembangogo.

Mezüngbuba anogo mezüngbuba innings nung Nagaland team-i run 211 dang yanglutet. Parnok rongnungi Sedezhali Rupreo-i run 45, Jonathan Rongsen-i 38, Yugandhar Singh-i 37 aser Jaganath Sinivas-i run 35* (not out) yanglua liasü.

Mizoram atema Mohit Jagra-i wicket trok agi Nagaland team nem run 211 dang yangludaktsü.

Mizoram team atema mezüngbuba innings nung Agni Chopra-i run 164 aser Mohit Jagra-i run 113* (not out) yanglua kanga junga asaya aser parnoki ajak senteper run 356

yanglua liasü. Nagaland team atema Tahmeed Rahman-i wicket 3 agi aser Karan Tewatiya o Jonathan Rongsen nati wicket anana agia liasü.

Tanabuba innings nung Nagaland team-i kanga junga asaya aser parnok rongnungi Sedezhali Rupreo-i run 179, Jaganath Sinivas-i 86, Sumit Kumar-i 74* (not out) aser Joshua Ben Ozukum-i run 70 yanglua parnoki wicket 7 out sür ajak senteper run 463/7 (declared) yanglu. Iba asaya akoktsü atema Mizoram team-i run 319 yanglutsü nungdaka liasü.

Mizoram team batting amenba mapang Nagaland team nungi bowler temi ball kanga junga aon aser parnok rongnungi Imliwati Lemtur-i wicket 4 aser Jaganath Sinivas-i wicket 2 agia liasü.

Team anapronglai asaya

akoktsü meranga asaya ajisüaka asayayonga aoba mapang Nagaland team jenjang tajungba aküm, kechiyong Mizoram nung batsmen tem out sümatok aser asaya akoktsü atema Nagaland team-i wicket ana dang agitsü nungdaka liasü. Ajisüaka Mizoram team nungi tatembangbuba batsmen ana yagi kanga kümdanga mena out masü aser asaya draw nung tembang.

Mizoram team-i tanabuba innings nung wicket 8 out sür run 221 yanglua liasü. Parnok rongnungi Mohit Jagra-i run 61 yanglu aser pai ball-a kanga junga aonba atema man of the match naroküm agitsü.

Nagaland team taruba asaya January 19 nungi 22 tashi Meghalaya den MCA Cricket Ground, Polo Ground, Shillong nung asayatsü.

Col C.K Nayudu Trophy: Nagaland-i Sikkim kokogo

Dimapur, Aenjeti/January 17 (TYO): Col C.K Nayudu Trophy nung Nagaland Under-23 team-i Sikkim team innings ka aser run 202 agi kokogo.

Mezüng bat asütsü shimba sülen Nagaland team nungi asayar Afzal-i run 125, Nchumbemo-i 83, Mughavi-i 77 aser Neizekho-i run 37* yanglua Nagaland team-i wicket 9 out sür run 425 (declared) yanglua liasü.

Sikkim team nungi Robin

Limboo-i wicket 3 agi.

Sikkim pur mezüngbuba innings nung Robin Limboo-i maneni kanga junga asaya-a pai out mesüi run 55 yanglu aser Denree-i run 26 yanglua liasü. Parnoki asayar ajak out sür run 143 dang yanglu.

Nagaland bowler tem rongnungi Neizekho-i wicket 6 agi aser Raja o Hem nati wicket anana agia liasü.

Follow-on achiba sülen

Sikkim team-i tanabuba innings nunga run 80 dang yanglur asayar ajak out süatok.

Nagaland team bowler tem rongnungi Neizekho-i ano wicket 5 agi aser Raja-i asem agia parnoki asaya ayong ayonga akok.

Nagaland U-23 team taruba asaya Arunachal Pradesh den Nagaland Cricket Stadium, Sovima nung January 21 nungi 24 tashi asayatsü.

Australian Open: Wozniacki aser Jabeur na tsükogo

Aenjeti/January 17, 2024 (Agencies): Taoba mapang Australian Open champion Caroline Wozniacki Bodhbarnü tanabuba round nung Russia tsür Maria Timofeeva-i tsükdaktsüogo.

Iba asaya nung Wozniacki atema Timofeeva ya jungrara liasü.

Mezüngbuba set bo 2018 champion Wozniacki-i ayong ayonga akok aser tanabuba set nunga lai service ka break süa tejakdang liasü ajisüaka aishi küm 20 tain qualifier yagi tanabuba aser tasembuba set nung kanga junga asaya asaya akok.

Iba asaya ya Timofeeva-i 1-6, 6-4, 6-1 agi koka liasü.

Iba asayamung mezüngbuba round nung Angelique Kerber aser Naomi Osaka na tsükba sülen

Wozniacki-a tanabuba round nung tsükogo, shiba mapang tatsüka masayai lir taoba küm nungi asaya tenzükshia liasü.

Timofeeva tasembuba round nung külem Russia nung qualifier Alina Korneeva mesüra seed 10buba nung alila Beatriz Haddad Maia den asayatsü

Bodhbarnü kasa asayamung tetsür kija asaya nung arishi küm 16 tain Russia tsür Mirra Andreeva-i seed trokbuba nung alila Ons Jabeur koka tasembuba round-i iogo.

Andreeva, Melbourne Park nung tang mezüngbuba asayamung asayar aser lai iba asayamung nung asemben tashi final tonga asayar alila Jabeur ya 6-0, 6-2 agi minute 54 nung koka liasü.

Andreeva-i tang mezüngbuba top-10 nung aliba

asayar ka kokogo, la ya taoba küm Wimbledon nung qualifier ka ama asaya tenzükba sülen round pezübuba tonga asaya aser iba ajanga la ajaki jangja aküm.

Maneni tetsür kija asaya nung defending champion Aryna Sabalenka aser US Open champion Coco Gauff nati pei tata asaya koka tasembuba round-i iogo.

Bodhbarnü tanabuba round nung Sabalenka-i arishi küm 16 tain Brenda Fruhvirtova 6-3, 6-2 agi ayong ayonga koka liasü.

Coco Gauff-ia tanabuba round nung külem America tsür Caroline Dolehide 7-6 (7/2), 6-2 agi kokogo aser la tasembuba round nunga America tsürsa Alycia Parks den asayatsü shibai Leylah Fernandez 7-5, 6-4 agi kokogo.

ICC T20I Rankings: Axar Patel pongububai tuogo

Aenjeti/January 17, 2024 (Agencies): Axar Patel-i pa indang career nung dang jenjang tajungtiba ajangzükta ICC Men's T20I bowler tem rangking nung jenjang 12 tejakdangi tua tang pongububa tongtetogo.

Afghanistan den asayaba mapang asaya ana nung Axar-i mezüngbuba nung run 23 agütsür wicket ana agi aser tanabuba nung run 16 agütsür wicket ana agiba sülen pa bowler tem rongnung jenjang junga kümogo aser all-rounders list nunga 16bubai tuogo.

Batsmen tem rongnung Yashasvi Jaiswal-i Indor nung Afghanistan den mezüngbuba T20I asayaba mapang ball 34 nung run 68 yangluba sülen pa jenjang tenet tejakdangi tua tang trokbuba nung lir.

Maneni batsman Shivam Dube-a jenjang 265 nungi 58bubai tuogo. Pai Afghanistan den asaya ana nung khen run 60 aser khen 63 yanglua liasü.

Kasa mapang nung New Zealand nung Finn Allen-a jenjang 11 tejakdangi tua tang batter tem rongnung 16buba nung lir. Pai Pakistan den mezüngbuba asaya ana nung run 34 aser 74 yanglua liasü. NZ nungersa Tim Southee-i mezüngbuba asaya ana nung wicket trok agiba sülen pa bowler tem rongnung jenjang ti tejakdangi tua tang 18buba nung lir.

India nung rongnungi Shubman Gill (jenjang 7 tejakdangi tua 60buba; batters), Tilak Verma (3 tejakdangi tua 61buba) aser Arshdeep Singh (pezü tejakdangi tua 21; bowlers) nungera tejakdangi tuogo.

Pakistan nungering nungtugu batter Babar Azam-i New Zealand den mezüngbuba asaya ana nung half-century ka ka yangluba sülen pa-a jenjang ka tejakdangi tua pezübuba nung lir aser Fakhar Zaman-a jenjang 14 tejakdangi tua 81buba tongogo.

Kharkiv nung Russia... (Tapak 7 nungi...)

Kharkiv Mayor Ihor Terekhov-i ashiba agi, missile ya military infrastructure tem dak masü saka nisung aliba kitem dak rangloker khaloktsüba liasü.

"Missile agi ki ter dak tema raksatsüogo. Teküzmükertemi ki raksar alibatemaneni bushisüngdangdar," ta pai Telegram ajanga metetdaktsü.

Ukraine indang Emergency Services-i ashiba agi, missile kati asemben tashi atongtepa tua sür aliba ki ka dak kongshi, kong taoba mapang medical centre ka amenoka liasü.

Kharkiv yimti ya Ukraine aser Russia na arrtsü nungi km30 dang pilar lir aser 2022 küm February ita nungi Ruissia-i Ukraine amak

tenzükba sülen iba yimti ya aiben maka arudar.

Kharkiv amakba dak sendakba nung Moscow-i kecha telanzüba magütsü, ajisüaka Defence Ministry-i ashiba agi, parnok indang air defence-i, Russia kübok Belgorod tesem nung Ukraine nung indang missile tenet aser drone pezü khadangogo.

Iba tesem indang governor, Vyacheslav Gladkov-i ashiba agi, lendong nung nisung taküm samaba osangbo kecha mali.

Russia-i Ukraine amak tenzükba sülen mapang tatsüka dang lir Russia nung sepaitemi Kharkiv temeket atsüng ajisüaka Ukraine nung sepaitemi 2022 küm September ita tanaben meyipa agiogo.

Tesüiba ghonda 24 tsüngta Gaza... (Tapak 7 nungi...)

Iba tesem nung bulldozer tem leper ka telung nung aliba video sayuogo aser nisung aika tsümgang mangu bushiteper. Prangbong aser bomb apokba ola angashi aser Israel indang gari senzüba video nung nguogo.

"Nikongdang 7:00 ako nung injang tulu kar onok alidak tsük aser onok kidang nungi mayazükta. Anepdang 1:00 ako meta Israel nung gari tem nisung aliba tesemi ait aser onük dak züka merenshi," ta kuli alir kari osangbener dang ashi.

Pei kidang Israel sepaitemi pua asüngdangyar temi ashiba

agi, parnok dang ki yutsür ainshitsü ashi asür aji mezüra bomb pokloksütsü ta ashi.

Occupied West Bank nunga Israel sepaitemi Palestine nung nisung 85 pua lir, ta Palestinian Wafa news agency ajanga ashir.

Pua alirtem rongnung parnok 40 shi Palestine nung Gaza Strip nungi lir, shirnok West Bank nung mapa inyaka liasü, ta ashi.

Israel-i October 7 nü nungi tenzükba occupied West Bank nungi Palestine nung nisung 6,000 jungnüa puogo.

BILEMDANGANG

"Tangar anema bilemba agi nü mulung temenendaktsü."